

Մեկը հավերժի ճամփորդներից

Ավետիք Իսահակյանի ծննդյան 130-ամյակին նվիրված միջոցառումները (գրքի տպագրություն, ցուցահանդեսներ, գրական-երաժշտական ցերեկույթներ, հեռուստահաղորդումներ, այցելություններ եւ այլն) սկիզբ էին առել ապրիլ ամսից եւ ամփոփվեցին Վարպետին նվիրված գիտական ընթերցումներով: Նախածեռնողն ու իրականացնողը Ավետիք Իսահակյանի տուն-թանգարանն էր, իսկ եզրափակիչ գիտաժողովը կազմակերպվել էր ՀՀ ԳԱ գրականության ինստիտուտի եւ ԵՊՀ բանասիրական ֆակուլտետի հետ համատեղ:

Վարպետի հարկի տակ հավաքվել էին նրա ստեղծագործության երկրպագուները՝ լսելու բանասիրության դոկտորներ **Ավիկ Իսահակյանի, Ազատ Եղիազարյանի, Սամվել Մուրադյանի, Վլադիմիր Կիրակոսյանի, Ալբերտ Մուշեղյանի**, բանասիրության թեկնածուներ **Անահիտ Վարդանյանի, Անժելա Խորենյանի** ելույթները՝ «*Իսահակյանը եւ հայկական հարցը*», «*Իսահակյանի մեկ բանաստեղծության պատմություն*», «*Ավետիք Իսահակյանի երկու «Բինգյուլը*», «*Շուշիկի կերպարը Իսահակյանի քնարերգությունում*», «*Ավ. Իսահակյանի ձեռագրերի աշխարհում*», «*Գյոթեի վերջին սերը*», «*Ազգային ազատագրական պայքարի արժարժունը «Մասսա Մանուկ» պոեմում*», «*Անավարտության խնդիրը «Ուստա Կարո» վեպում*» թեմաներով: Ուշագրավ փաստերի, բացահայ-

տումների, մեկնաբանությունների շնորհիվ բանախոսները փորձեցին նոր լույսի տակ ներկայացնել Վարպետի ստեղծագործական դավանանքը, ներանձնական ապրումները, հայրենասիրական մղումները, քաղաքացիական դիրքորոշումն ու նրա վիթխարի անհատականությունը հատկանշող շատ այլ դրսեւորումներ: Բարձրացված խնդիրների շուրջ ծավալվեցին ակտիվ քննարկումներ ու բանավեճեր, որոնք շահագրգիռ միտում ունեին առավել համակողմանիորեն եւ ճշգրիտ արժեւորել Իսահակյանի խորախորհուրդ աշխարհը: Այս միջոցառումով սկիզբ դրվեց իսահակյանական գիտական ընթերցումների ավանդույթին: Նշվեց, որ դրանք կհամալրեն թումանյանական եւ չարենցյան գիտական ընթերցումների շարքը:

Միջոցառումն ամփոփող խոսքում Սամվել Մուրադյանն իր գոհունակությունն ու գնահատանքն արտահայտեց կազմակերպիչներին՝ Վարպետի հետ այդ յուրօրինակ շփումն իրագործելու համար:

Գիտաժողովից հետո տուն-թանգարանի տնօրեն **Հասմիկ Մելքոնյանին** խնդրեցինք իր խոսքն ուղղել «**Կրթություն**» թերթի ընթերցողներին: Նա ասաց. «*Դպրոցականներին եւ ուսուցիչներին կցանկանայի ասել, որ Վարպետի տուն այցելությունը նրանց համար ոչ միայն հուզական ապրումների առիթ կդառնա, նրանք ոչ միայն կտեսնեն այն տունը, կզգան այն մթնոլորտը,*



որի մեջ Իսահակյանն ապրել, շնչել, ստեղծագործել է, այլեւ կընդլայնեն իրենց իմացությունները նրա մասին: Տարիների փորձը ցույց է տվել, որ թանգարանն Իսահակյանի մասին ավելի շատ տեղեկություններ է տալիս, քան ընդգրկում է դպրոցական ծրագիրը: Սա վկայում են հենց իրենք՝ ուսուցիչները: Դա ամենամեծ վարձատրությունն է թանգարանի աշխատողներիս համար: Եվ ցանկալի է, որ այցելությունը թանգարան ոչ թե կրի ձեւական բնույթ, այլ լինի հոգու թելադրանքով, գիտակցված: Եվ ճիշտ կլինի, որ ուսուցիչներն, աշակերտներին տվյալ գրողի տուն-թանգարան տանելուց առաջ, նախապատրաստեն նրանց, ծանոթացնեն նյութին, բացատրեն, թե ուր են գնալու: Այս դեպքում այցելություններն, անշուշտ, կտան առավել ցանկալի արդյունք»:

Կարինե ՌԱՖԱՅԵԼՅԱՆ